



Universitätsbibliothek Paderborn

**Antiquissima Fides Et Vera Religio. Christianam Fidem
Mox à Primis mundi exordijs ad hæc usq[ue] tempora
durasse eamq[ue] ueram & indubitatum esse, Heinrychi
Bullingeri Apodixis, siue clara & t ...**

Bullinger, Heinrich

Tigvri, 1544

VD16 B 9603

Primarium atque firmissimum sanctissimæ nostræ Christianæ fidei
fundamentum. Cap. III.

urn:nbn:de:hbz:466:1-35388

ANTIQUISSIMA FIDES

bolo sese emancipans, cui, relicto deo, & seruierat
& crediderat) meritus, in seruitutem diaboli, & te-
nebrarum cæcas uoragini præcipitabatur. Atq;
hæc de benignitate & fidelitate dei, simul & de
hominis malitia & perfidia dicta sint.

*Primarium atque firmissimum sanctissimæ nostræ Chri-
stianæ fidei fundamentum.*

C A P. III.

*De iustitia
& miseri-
cordia dei.*

IN hac igitur rerum cōditione, Deus Opt. Max.
non tam honestis, quām etiā iustissimis ratio-
nibus potuisset hominem, nō solum tanquam fœ-
disfragum atque contemptorē, repudiare, reiçere,
denique affligere grauiter, sed etiam iusto iudicio
condemnatū, in horrendas diaboli, tartariq; fau-
ces præcipitare, imò ut hoc faceret, & ueritas & iu-
stitia expostulabant. Sic enim apertis uerbis Ada-
mo dixerat citra omnem obscuritatem, Eo ipso
die, quo de fructu ligni huius comedes, morte mo-
rieris. Huic tamen iustitiæ & ueritatis rigori mise-
ricordia sese opponebat, patrocinando humanæ
carnis infirmitati, ita temperans, medio quodam
inuento, negotium, ut simul iustitiæ satis fieret, &
humano interim per misericordiam parceretur ge-
neri. Illud uero mediū, in quo iustitia & misericor-
dia concurrunt, Christus Iesus est, qui ex mera dei
gratia nobis donatus, pro peccatis nostris immo-
latus, diuinæ iustitiæ, ne quid desideraret, satisfe-
cit, eidemq; nos reconcilians, satanæ & inferni ar-
etissima uincula quibus uincti tenebamur, disru-
pit.

pit. Ipse siquidē pro omnibus mortuus est, quod *Gratia dei* facile possumus coniçere ex unico illo uerbo, *Adamō nū dicentis ad Adamū*, Eo die quo de fructu illo co*tiatur*.
medes, morte morieris. Igitur quemadmodū per Adamum omnes mortui sunt, ita Christus quoqz pro omnibus nobis mortē subistt, ut per illius mortem uiueremus, atqz à tenebrarum tyrannide asserti, in regnum Christi dilectissimi filij dei transferremur. Hoc diuinæ sapientiç consilium, dubio procul ante infinita secula initum, etiam Adamo post lapsum ipsius, decoro quodam ordine mani festatū est, in hūc modum. Postquam homo de interdicto fructu arboris comedisset, è uestigio oculi illius aperti sunt, qbus illuminatis, cū seipsum consyderasset, ac nuditatem conspexisset, pudore suffusus est. Is itaqz qui haçtenus innocenter uixerat, de uelamine solitus, uilissimo certe, cui non tantum fidebat, quin à conspectu creatoris fugitans, latitaret, tegebatur: uel per id humanę naturę *Peccatum*, miseriam prodens, quę non quicquam pr̄ter inutilia peccatis suis apud deū pr̄texere solet. Deus itaqz pauitantē ac fugitantē insecurus, ut refricaret uulnus, & iacturā beatissimę uitę, qua exciderat, ob oculos poneret, eiusmodi uerbis alloquitur, *Adam ubi es? Agnoscis ne tuam miseriā? in quam te ipsum amissa salute pr̄cipitasti?* Atque ut graui onere, iamiam ceruici eius imminente, hominē leuaret, atqz peccati confessionē extorqueret saltē aliquid, multū laborat, sed frustra. Is nanqz malitiā suam nec agnosces nec confitens, tantū nudita

B

ANTIQUISSIMA FIDES

tem excusat suam, quod à facie eius fugerit. Dominus itaq; urgens negotium, si quo modo culpę confessionem exculperet, addit, Quis quæso, tibi quod nudus essem ostendit? Cum & hic conatus quoque esset frustraneus, & ad cōfessionem extor quendam inutilis, subdit, Mirum ni comedisti de arbore, ex qua præceperam tibi ne comederes. Cæterum homo nec sic quidem peccatum ingenue confiteri uolens, culpam in sociam, uxorem scilicet cōiūcit, idq; tam acerbis tamq; suspectis uerbis, ut planè uideretur in corde suo satis impie & iniuste deum admissi sceleris authorē facere: quod uel ex illo liquet, quod non simpliciter domino responderet, Vxor mihi prohibitū cibum obtulit, sed cum indignatione quadam in hæc erumperet uerba, Vxor, quam te authore habeo, id cōsiliū dedidit. Ac si diceret, Tu ipse harum rerum omniū caput es. Illa enim, quam tu mihi dedisti sociam, me in fraudem illexit, ut præceptum tuum præuari carer, non præuaricaturus haud dubie si illam nō dedisses, quantumuis deus, qui uere iustus est, uxorem Adamo nequaquam dedisset, ut illum fraude deceptum seduceret, uerum potius consolationis gratia, ut tanquā uitæ socia mutuo auxilio ipsum iuuaret. In hoc quoq; negotio nefanda hominis audacia cum grauissimo delicto se prodit. Cæterum ne sic quidem paternus & ardentissimus iuuandi affectus in deo extinguitur, sed omnē moet lapidem, si quo modo uel uxorē saltem huius calamitatis & miserię fontem ad confessionē pelleret.

Gratia.

pelleret. Sed hominis pertinacia omnem dei conatum euincebat. Similes habebat labra lactucas, impius & contumax erat Adam, impia item & contumax erat Eua. Nam quemadmodum Adam omnem culpam in uxorem congesserat, sic & uxor cacodæmonem, qui sub serpentis specie apparuerat, transgressionis authorem facit. Hæc praua indulcis contumacia, hæreditaria quadam labe, etiam hodie corda hominum occupat, atque in ijsdem alte radices egit. Quis hominum uero (dummodo negotium illud, de quo nunc egimus, diligenter apud se exp̄dar) adeo nullius esset iudicij, aut tantè impieratis, qui cogitaret tantum, nedum diceret, minutissimam promissionis, iustitię atq; beatitudinis eterne partem, hominis aut uiribus, aut meritis imputandam esse? Cum luce clarius sit, quam ineptius ac importunus, quamq; perditus ac miser homo per se sit: cui, (quantū ad propriam indolem attinet) omnia negata sunt, pr̄ter unum quiddam, quod est peccata peccatis, & inobedientiam inobedientia cumulare. E diuerso quis adeo oculis ac mente captus esse possit, ut non uideat omnem salutis nostræ rationem, gratię & misericordię dei adscribendam esse: quod & sequentia facile indicabūt, in quibus demonstrabimus, quid deus in hoc negotio cum homine egerit.

Cum igitur omnis culpa in serpente h̄ceret, dō pæna. minus serpentem nec interrogare nec audire dignatur, cum quod factum esset, res ipsa indicaret & manifestissimum esset. Deus etenim serpentem

ANTIQUISSIMA FIDES

non creauerat ut loqueretur : præterea in diabolo
tanquam patre mendaciorum nulla erat ueritas.
Itaque deus execratur diabolum, qui leberide te-
ctus, homini imposuerat. Neque uerus serpens,
quem dominus creauerat, quo humani generis
aduersarius ceu instrumento usus fuerat, id quod
fecerat, impune fert: nam illi quoque dominus ma-
ledicit, hunc in modum, Super pectus tuum gra-
dieris, & terrā comedes cunctis diebus uitæ tuæ.
Quibus peractis, ordo iam hominem postulabat,
ut & is quoque secundum ueritatem & iustitiam
diuinam, meritas pœnas daret, atque non solum
maledictionem acciperet, sed insuper æterna mor-
te damnaretur. Sed eas ob causas, quas in limine
huius capitatis enarraui, maledictionis huius uires
euacuātur per intercessorē Christum, quem deus
apertissimis uerbis promittit, & in eo ac per eum
uitæ restitucionem. Eam ob rem dominus nō in-
Promissio. quirit, Et tu homo quoque maledictus esto, eo quod
præceptum meū præuaricatus es, sed, Inimicitias
ponam inter te & mulierem, & semen tuum, &
semen illius : Ipsa conteret caput tuum, & tu insi-
diaberis calcaneo eius. Ac si diceret, Tu muliere
tanquam instrumento usus es ad humani generis
perniciem, quæ deinceps mortuos atque condem-
natos, ex propria indole ac natura pariat. Quapro-
pter quemadmodum tu illa abusus es ad hominis
interitum, ita mulier quoque instrumentum se mihi
præbebit ad uitam hominis recuperandam. Ex
ea enim nascetur semen aut infans, qui tibi caput
tuum

rum diminuat ac conterat, hoc est potentiā tuam
atque imperium, cum peccato atque condemna-
tione, singula hæc cōtusa ac diminuta ē manibus
tuis extorqueat. Quāuis in hoc negotio peragen-
do humani corporis iacturam facturus sit. Hæc
explanationis gratia copiosius cōmoda paraphra-
si hoc modo reddi possunt. Homo sua transgres-
sione æternæ mortis pœnā meruerat, ita ut secun-
dum iustissimum iudicium meum, calumniatoris
imperio cessisset. Sed ego eius ratione habita, il-
lius miserebor, atque reconciliabor illi. Verum ne
& ueritati & iustitiæ meæ aliquid decedat, curabo
ut filius meus uera hominis natura assūpta, ma-
ledictionis & condemnationis onus, in suos hu-
meros sublatū, sua morte persoluat, atq; per me-
ritum non meritæ mortis, hominē reum iam, atq;
maledictioni expositum, in libertatem afferens, ex
morte in uitam, ex potestate cacodæmonis in re-
gnum suum cœleste, ex tenebris in lucem transfe-
rat. Ita firmū & immobile manet sacrosanctę no- *Fides.*
stræ fidei fundamentum, quod scilicet omne ge-
nus humanum ex sola misericordia meraq; gra-
tia dei à peccatis per Iesum Christum repurgatū,
æternæ fœlicitatis prēmium consequatur: deniq;
à maledictione, diabolo, atque sempiterno sup-
plicio liberetur. Ad hoc respexit diuus aposto-
lus Paulus s. cap. ad Rom. cum ait, Etenim quod
lex præstare non poterat, hoc deus proprio filio
missō sub specie carnis peccato obnoxię præstīt.
Atque de peccato condemnauit peccatum per car-

A N T I Q V I S S I M A F I D E S

nem, id est, per carnis suę oblationem pro peccatis immolatam, perq; uoluntariam mortem Christi. Ac in prima epistola ad Corinthios 1. cap. idem Paulus ait, Ex eodē autē uos estis in Christo Iesu, qui factus fuit nobis sapientia à deo, iustitiaq; & sanctificatio & redemptio. Ut quemadmodū scriptum est, Qui gloriatur, in domino & gloriatur & confidat.

Evangeliū de IESV Christo. Quādoquidē uero illa promissio prima est, atq; uerum illud Euangeliū, lātum, inquā, nuncium, salutem humano generi annuciās, maiori quādam diligentia & acriori iudicio & studio de singulis differendum est uocabulis.

Primo deus filium suum dominum nostrum Iesum Christum nuncupat Semen mulieris, idq; propter ueram propriamq; hominis substantiam atque naturam olim assumendam. Ex quo praeueniretur hæreticæ quorundam opinioni, quæ de phantastico atque putatiuo Christi corpore, nec scio quid somniari posset. Deinde addit Mulieris, Christum uocans semen mulieris : mulieris utiq; non uiri semen. Quo sanè mysterio adumbratum est, dominū nostrum Iesum Christum non ē uirili seminē, neque concipiendum neque nascendum: uerum ē spiritu sancto, atque ex Maria uirgine. Itaq; plane absurdum est, ut ex dictione mulieris Euam intelligamus, sicut quorundam inepta est sententia, sed potius Mariam uirginem. Cæterum quod Maria uere uirgo existens mulieris nomine appellatur, sexus gratia fit. Nam uirgines quoque

ET VERA RELIGIO. 9

que mulieris uocabulo comprehenduntur, id est circa castitatis & uirginitatis iacturā. Præterea deus locutus est hoc in loco cum demonstratione, & emphasi quadam ceu mÿsterium nobis commendas, significanter dixit, Ponam inimicitiam בָּרֶגֶל וְבִרְגֵל הַאֲשֶׁת mulierē. Nam per demonstratiuā particulā נָסָר, singularē quādam intelligit mulierē, nimirū eam, quam nobis graphice depingit Esaias, dicens, Ecce uirgo concipiet, & uirgo pariet &c. Atq; hanc dictionem Semen ita usus obtinuit, ut illam post Adami tempora perpetuo in omnibus renouationibus huius promissionis de Christo Iesu, omnes patriarchæ atque prophetæ repetendo protulerint usque ad Dauidis tempora: post ea quippe dominus noster frequētius flos, arbor, uel lignum uitæ, surculus aut germen Dauidis uocatus est. Paulus etiam in epistola ad Galatas cap. 3. manifestissime indicat, atque explanat per dictionem Semen, Christum intelligi. Hoc etiam multum laudis parit matri dei, quod deus locutus est, Ego inimicitias ponam inter mulierem & inter te. In eo enim maximam naturarum diuersitatem & inæqualitatē intelligit. Diabolus est elatus, uersutus, malignus, falsus atque mendax. Confer nunc illi Christi genitricem, atque naturam illius diligēter examina, atque facile deprehendes eam esse ab omni fastu alienissimam, simplicitatis studiosam, mansuetam ac placidam, fidei ac synceritatis plenam, castam, puramq;. Atque haec tam casta illibata

B 4

ANTIQUISSIMA FIDES

taq; uirgo, & mater omni gratia plenissima, illum
nobis peperit saluatorem, qui serpenti caput con-
trivit.

Iustitia,

Serpentis caput diaboli potestas & regnum est,
in quo illius aulici diu seruicēdo hæc præmia con-
sequi possunt, peccatum, maledictionem, atq; æter-
nam damnationē. Ne itaq; sub illo principe me-
rere cogamur, tantum impedit benedictum illud
semen diuinitus homini, ut succurrat, missum.
Eadem hæc & diuus Paulus docet Hebr. 2. cap. ad
hunc modum, Posteaquam igitur pueri commer-
cium habent cum sanguine, & ipse similiter par-
ticeps factus est eorundem, ut per mortē aboleret
eum qui mortis habebat imperium, hoc est diabo-
lum: & liberos redderet eos quicunq; metu mor-
tis per omnem uitam obnoxij erant seruituti. Nō
enim uidelicet angelos assumit, sed semen Abra-
hæ assumit. Ad hanc sententiam illustrandam ac
comprobandam non parum facit quod sequitur,
Et tu calcaneo eius insidiaberis. Calcaneum ima-
pars hominis est, quæ ceu effigie quadam aut pa-
radigate Christi carnem humanam nobis effin-
git. Eam carnem diabolus per Caiapham, An-
nam, Herodem, & Pontium Pilatum membra sua
letali odio ad interitum usque prosecutus est. Id
testatur Petrus prima epistola cap. 3. & ab initio
quarti, Christum in carne pro nobis passum esse:
diuina quippe natura pati non potest, nec anima
quoque mortalis est. Per cōminutionem uero hu-
manitatis Christi, cœlestis pater diaboli imperiū
come

comminuit atq; protriuit, id est, per mortē protriuit mortem, atque uitam omnibus sanctis & fidelibus restituit. Hanc ob causam Christus salvator ipse ait, Ioan. 12. Nunc iudicium est mundi huius. Nunc princeps mundi huius ejscetur foras, & ego si exalratus à terra, id est, cum cruci affixus fuerō, omnes traham ad me ipsum. Postremo dominus inquit, Inimicitias ponā inter te & mulierem, & semen tuum & semen illius. Id facilime intelligere possumus ex diaboli eiusq; complicū dictis & factis, qui sese Christo & gloriæ, & ueritatis eius assertoribus in omnibus opponunt. Verument licet serpens modis omnibus omnia obnixe faciat, tamen per Christum eiusq; sectatores manus dare compellitur atq; conculcatur. Vnde Paulus ad Romanos cap. 16. non citra maximum solamen omnium fidelium inquit, Deus autem pacis conteret satanā sub pedes uestros breui. In hoc etiam satis compendiose continetur, quid pīj atq; fideles Christo ex officio debeant. Illis enim qui Christiae dicunt, Nū peracta & transacta omnia sunt, si me peccatorem esse cōfitear, ac credo per benedictum semen salutem cōsequi^r. Illis, inquam, commode uereq; obisci potest, Omnes quicūq; spem ac fiduciam in benedicto semine collocant, etiam seminis illius naturam induunt: è diuerso, serpentis naturam, quæ nihil præter peccata & scelera gignit, plusquam nouercali aut capitali odio prosequuntur, atque perpetuum bellum aduersus mundum, diabolumq; suscipientes, non absq; ardentissimo

Pugna.

B S

ANTIQUISSIMA FIDES

piōq; affectu diuinæ studēt uoluntati. Atque huc spectant quę sequūtur. Postquam enim homo periculo atq; metu æternæ mortis liberatus esset, plauit diuinæ sapiētiæ transgressorem pœna ad tempus durante corrigerē, in qua (ceu discipuli sub præceptoris disciplina solent) in hoc sæculo exerceretur. Vxori uero, quod prior præceptum transgressa esset id oneris imponebat, scilicet mœrorē, anxietatem, dolorem in gerēdo uterum & pariendo. Ad hæc accedebat seruitus, quam marito debebat, cum timore ac subiectione animi. Viro autē hoc oneris imponebatur, ut terram maledictam, multo cum sudore excoleret. Eam maledictam fuisse, uel hoc subindicat, quod dominus ait, Quia audiuisti uocē uxoris tuæ, & comedisti de ligno, de quo præceperam ne comederes, maledicta terra in opere tuo : in laboribus comedes ex ea cunctis diebus uitæ tuæ, spinas & tribulos germinabit tibi, & comedes herbas terræ. In sudore uultus tui uesceris pane. Ad hæc mala, accessit corporis humani destructio, illi enim qui perennē uitā in paradiſo degere potuissent, mortis imperio subiectebātur. Illis enim quæ modo rerulimus hæc adiūciebat dñs, In sudore uultus tui uesceris pane, donec reuertaris in terrā, de qua sumptus es, q; puluis es, & in puluerē reuerteris. Prioris illius meminit Paulus 1. Tim. 2. ca. cū inquit, Mulier seducta, obnoxia facta est transgressioni : salua tamen fieri per generationem liberorum, si manserit in dilectione ac fide, in sanctificatione ac castitate. De

secun

ET VERA RELIGIO. II

secundo idem Paulus loquitur in epistola ad Ephes. 4. cap. Quapropter deposito mendacio, loquamini ueritatē quisq; cum proximo suo, quoniam sumus inuicem membra &c. Deinde, Qui furabatur, non amplius furetur: magis autē laboret operando manibus quod bonum fuerit, ut possit impari ei, qui opus habuerit. Eadem fermē docet in prima Thess. 4. cap. Ne quis opprimat aut fraudet fratrem suum in negotio, propterea quod ultor est dominus de his &c. Post hæc in eodem capite subiungitur, Et agatis res proprias & operamini proprijs manibus uestris, sicuti uobis præcepimus: & uos geratis honeste erga extraneos, ut nulla re uobis opus sit. De morte uero talia dicit Paulus Hebr. 9. cap. Et quatenus illud manet homines, ut semel moriantur, post hoc autem iudicium. Ita & Christus semel oblatus, ut peccata multorum tolleret.

De primis Christi fidelibus Adamo & Eua.

C A P. IIII.

HA C T E N V S, ni fallor, in primis hisce dei promissionibus, liquido conspeximus sanctissimæ nostræ professionis periocham & fundamenta: nempe quod totum humanum genus suo ipsius merito, quin & malitia propria perierit, atq; non solum in corporis perniciem, sed & animæ damnationem lapsum fuerit, quodq; in homine plane nihil sit, quam quod deo summo displi-